

## **CONVENIO ENTRE O CONSELLO XERAL DO PODER XUDICIAL, O MINISTERIO DA PRESIDENCIA, XUSTIZA E RELACIÓNS COAS CORTES, A COMUNIDADE AUTÓNOMA DE GALICIA E A UNIVERSIDADE DE VIGO, PARA A REALIZACIÓN DE PRÁCTICAS EXTERNAS EN XULGADOS E TRIBUNAIS**

En Madrid, asinado electronicamente 09.05.2024

### **REUNIDOS**

O presidente do Consello Xeral do Poder Xudicial, p.s., o vogal Excmo. Sr. D. Vicente Guilarte Gutiérrez, nomeado segundo o Acordo (núm. 1.20) do Pleno do Consello Xeral do Poder Xudicial do 19 de xullo de 2023, no exercicio das facultades que lle atribúe o artigo 585 da Lei orgánica 6/1985, do 1 de xullo, do poder xudicial, e en representación do Consello Xeral do Poder Xudicial segundo a previsión do artigo 598.1 da Lei orgánica do poder xudicial.

O secretario de Estado de Xustiza, Sr. D. Manuel Olmedo Palacios, de acordo co Real decreto 949/2023, do 28 de novembro, no uso das competencias que lle corresponden en virtude do artigo 62.2.g) da Lei 40/2015, do 1 de outubro, de réxime xurídico do sector público.

O vicepresidente primeiro e conselleiro de Presidencia, Xustiza e Deportes da Xunta de Galicia, Sr. D. Diego Calvo Pouso, actuando en nome e representación da Xunta de Galicia, en virtude do Decreto 65/2023, do 14 de xuño, e no exercicio das facultades que lle confire o artigo 34 da Lei 1/1983, do 22 de febreiro, reguladora da Xunta e da súa Presidencia.

O reitor magnífico da Universidade de Vigo, D. Manuel Joaquín Reigosa Roger, nomeado segundo o Decreto da Comunidade Autónoma de Galicia 110/2022, do 9 de xuño, publicado no *Diario Oficial de Galicia* (DOG) núm. 117, do 20 de xuño, e de acordo coas competencias que lle outorga o artigo 50 da Lei orgánica 2/2023, do 22 de marzo, do sistema universitario, e mais o artigo 29 dos Estatutos da Universidade de Vigo, aprobados polo Decreto 13/2019, do 24 de xaneiro, e publicados no DOG núm. 38, do 22 de febreiro.

As partes recoñécense mutuamente plena capacidade de actuar, na representación legal que portan, para subscribir o presente convenio, e a tal fin

## MANIFESTAN:

**Primeiro.** O Estado ten competencia exclusiva en materia de Administración de xustiza, de acordo co artigo 149.1.5ª da Constitución española.

**Segundo.** O Consello Xeral do Poder Xudicial é o órgano de goberno deste, segundo o artigo 122.2 da Constitución española, e as súas atribucións veñen reguladas nos artigos 558 a 565 da Lei orgánica 6/1985, do 1 de xullo, do poder xudicial.

**Terceiro.** O artigo 435 e concordantes da Lei orgánica do poder xudicial determina que a oficina xudicial é a organización de carácter instrumental que serve de soporte e apoio á actividade xurisdiccional de xulgados e tribunais, así como que a dirección dos servizos comúns procesuais lle corresponde ao corpo de letrados da Administración de xustiza, funcionarios públicos que constitúen un corpo superior xurídico, único, de carácter nacional, ao servizo da Administración de xustiza, dependente do Ministerio da Presidencia, Xustiza e Relacións coas Cortes, e que exercen as súas funcións co carácter de autoridade, desempeñando a dirección da oficina xudicial.

**Cuarto.** O Real decreto 2166/1994, do 4 de novembro, sobre traspaso de funcións en materia de provisión de medios materiais e económicos para o funcionamento da Administración de xustiza (funcións asumidas a través do Decreto 394/1994, do 29 de decembro); o Real decreto 2397/1996, do 22 de novembro, sobre traspaso de funcións e servizos en materia de medios persoais ao servizo da Administración de xustiza (funcións asumidas a través do Decreto 438/1996, do 20 de decembro); e mais o Real decreto 233/1998, do 16 de febreiro, sobre traspaso das competencias equivalentes relativas ás fiscalías de Galicia e aos institutos de medicina legal (funcións asumidas a través do Decreto 82/1998, do 5 de marzo), completan o proceso de transferencia de medios en materia de xustiza á Comunidade Autónoma de Galicia.

**Quinto.** Á súa vez, o Regulamento 1/2000, dos órganos de goberno de tribunais, aprobado por Acordo do 26 de xullo de 2000, do Pleno do Consello Xeral do Poder Xudicial, no seu artigo 4.º) prescribe que as actividades alleas á función xudicial en edificios xudiciais ou nas súas dependencias non se poderán levar a cabo sen o acordo da sala de goberno, o da Administración a quen corresponda a titularidade do inmovible e o das demais administracións con competencias concorrentes, se as houber.

**Sexto.** O Estatuto de autonomía de Galicia, aprobado pola Lei orgánica 1/1981, do 6 de abril, establece no seu artigo 20.1 que en relación coa Administración de xustiza lle corresponde á comunidade autónoma exercer todas as facultades que as leis orgánicas do poder xudicial e do Consello Xeral do Poder Xudicial recoñecen ou atribúen ao Goberno do Estado. Nesta cláusula estatutaria atópase a orixe do traspaso á Comunidade Autónoma de Galicia das funcións que desempeñaba a Administración do Estado en materia de provisión de medios materiais e económicos para o funcionamento da Administración de xustiza. Así mesmo, á Vicepresidencia Primeira e Consellería de Presidencia, Xustiza e Deportes da Xunta de Galicia, de conformidade co disposto no Decreto 117/2022, do 23 de xuño, polo que se establece a súa estrutura orgánica, e que segue a ser de aplicación coas modificacións introducidas polo Decreto 144/2023, do 9 de novembro, correspóndenlle, entre outras, as competencias en materia de medios persoais e materiais para o funcionamento da Administración de xustiza en Galicia.

**Sétimo.** Un dos fins da Universidade de Vigo é o da preparación académica e profesional dos distintos ámbitos e disciplinas dos seus estudantes, e para dar cumprimento a este obxectivo resulta de interese a organización de prácticas externas que completen os coñecementos adquiridos nas aulas.

**Oitavo.** As institucións asinantes manifestan a súa máis ampla coincidencia en diversos fins de interese común, sendo un deles o da formación integral de alumnado universitario a través dunha formación que combine a teoría e a práctica.

**Noveno.** O Real decreto 592/2014, do 11 de xullo, polo que se regulan as prácticas académicas externas dos estudantes universitarios, desenvolve aspectos tales como os obxectivos das prácticas, as entidades colaboradoras e os destinatarios, requisitos, titorías e contidos dos convenios de cooperación educativa. Ademais, a dita regulación debe promover a incorporación de

estudantes en prácticas no ámbito das administracións públicas, impulsando a empregabilidade dos futuros profesionais, fomentando a súa capacidade de emprendemento, creatividade e innovación e dando resposta ao compromiso coa transformación económica baseada na sociedade do coñecemento.

**Décimo.** O presente convenio axústase ao modelo de convenio prácticum aprobado pola Comisión Permanente do Consello Xeral do Poder Xudicial.

**Undécimo.** É desexo das institucións asinantes a organización de prácticas externas en xulgados e tribunais na forma que se detalla na parte dispositiva deste convenio, por considerar que esta actividade pode resultar de grande interese para a formación de profesionais que nun futuro poidan colaborar ou dar servizo á Administración de xustiza, o que redundará nunha maior calidade desta.

A dita colaboración concrétase en que o alumnado que cursa estudos na Universidade de Vigo poida realizar prácticas externas en xulgados e tribunais da Comunidade Autónoma de Galicia de conformidade coas seguintes

## CLÁUSULAS:

### **Primeira. *Obxecto e compromisos das partes.***

Constitúe o obxecto do presente convenio a realización de prácticas externas curriculares e extracurriculares (de aquí en diante, prácticas externas) por parte do alumnado matriculado na materia de prácticas académicas de estudos oficiais de grao e/ou mestrado que imparte a Universidade de Vigo, e sempre de titulacións relacionadas con profesións da Administración de xustiza, nos xulgados e tribunais da Comunidade Autónoma de Galicia.

Por un lado, a Vicepresidencia Primeira e Consellería de Presidencia, Xustiza e Deportes da Xunta de Galicia comprométese a permitir a realización das prácticas externas obxecto do presente convenio, así como a facilitar o acceso do alumnado ás sedes dos xulgados e tribunais.

Por outro lado, a Universidade de Vigo comprométese a que a persoa ou persoas que exerza/n a titoría das prácticas no órgano xudicial poida/n gozar

dos seguintes dereitos, no marco da normativa propia da Universidade de Vigo que sexa de aplicación:

- a) Recoñecemento da súa actividade colaboradora mediante documento acreditativo expedido pola Universidade de Vigo que certifique a súa actividade como titor/a de estudantes en prácticas.
- b) Ser informada acerca da normativa que regula as prácticas externas, así como do proxecto formativo e das condicións do seu desenvolvemento.
- c) Ter acceso á Universidade para obter a información e o apoio necesarios no cumprimento dos fins propios da súa función.
- d) Gozar das mesmas vantaxes ca o persoal da Universidade no concernente ao acceso a bibliotecas, instalacións deportivas ou actividades culturais, entre outras.

A colaboración que prestan o Consello Xeral do Poder Xudicial, o Ministerio da Presidencia, Xustiza e Relacións coas Cortes e a Comunidade Autónoma de Galicia estará sempre supeditada ás necesidades e dispoñibilidade do xulgado ou tribunal onde se realicen as prácticas externas, polo que xurdida tal necesidade ou falta de dispoñibilidade, se for o caso, o convenio quedará suspendido entreméntres persistan estas situacións ou, se é o caso, extinguido, sen que sexa preciso denuncia previa neste sentido e sen dereito a reclamación ningunha por parte da Universidade de Vigo nin concesión de indemnización ou compensación ao seu favor.

Así mesmo, a Universidade comprométese, en función da súa dispoñibilidade, a prestar a súa colaboración ao Ministerio da Presidencia, Xustiza e Relacións coas Cortes e mais ao Consello Xeral do Poder Xudicial mediante a cesión de aulas, outorgando unha autorización de uso das aulas de carácter gratuíto dentro dos espazos xestionados pola Universidade e dependendo das súas necesidades docentes, con excepción dos gastos extraordinarios en que se poida incurrir –tales como gastos de seguridade, portaría, limpeza, liñas de voz e datos, iluminación ou vixilancia–, con ocasión da celebración de probas correspondentes a procesos selectivos para o ingreso ou acceso de persoal funcionario ao servizo da Administración de xustiza e de acceso ás carreiras xudicial e fiscal.

As partes determinarán, de común acordo, o número de estudantes que realizarán as prácticas nos xulgados e tribunais.

**Segunda. Condicións e requisitos xerais das prácticas.**

1. As prácticas externas axustaranse en todo caso á normativa vixente, e en especial ao establecido no Real decreto 592/2014, do 11 de xullo, polo que se regulan as prácticas académicas externas dos estudantes universitarios.

Cada alumno/a deberá subscribir ao inicio das prácticas o documento que se achega como anexo ao presente convenio.

2. Establécense dúas modalidades de prácticas externas, que poden ser concorrentes:

a) Prácticas curriculares.- Son as prácticas que teñen a súa orixe nos diversos plans de estudos, que son obrigatorias para obter a titulación requirida.

b) Prácticas extracurriculares.- Son aquelas que os estudantes realizan con carácter voluntario durante o seu período de formación e que, inda tendo os mesmos fins ca as curriculares, non están incluídas nos plans de estudos, sen prexuízo da súa mención posterior no Suplemento Europeo ao Título.

3. O alumnado será proposto pola persoa que exerza a dirección das prácticas externas da Universidade de Vigo.

4. As prácticas externas do alumnado axustaranse ás necesidades organizativas establecidas pola persoa ou persoas que exerce/n a súa titoría no lugar onde se realicen as mesmas, de tal modo que non se entorpeza o desempeño normal das súas funcións.

O acceso do alumnado ás actuacións xudiciais producirase na medida en que o permita a situación do procedemento e a súa declaración ou non de secreto, e quedando salvagardado o deber de reserva ou sxiilo e preservada, en todo caso, a identidade das persoas implicadas ou partes.

As prácticas externas terán a duración que determine a Universidade de Vigo e realizaranse en horario de mañá nos xulgados ou tribunais, horario que en



ambos os casos establecerá a persoa responsable dos mesmos en función do mellor funcionamento do órgano xurisdiccional.

Nos supostos de faltas reiteradas de puntualidade, asistencia, incorrecto comportamento do alumnado ou perturbación do normal funcionamento do xulgado ou tribunal onde se realicen as prácticas externas, o Consello Xeral do Poder Xudicial, o Ministerio da Presidencia, Xustiza e Relacións coas Cortes, a Comunidade Autónoma de Galicia ou os xulgados e tribunais afectados poderán suspender de forma inmediata e cautelar as ditas prácticas, pódoo en coñecemento da Universidade para que adopte as medidas que considere oportunas.

5. O Consello Xeral do Poder Xudicial, o Ministerio da Presidencia, Xustiza e Relacións coas Cortes e a Comunidade Autónoma de Galicia quedan exentos de calquera responsabilidade respecto ao alumnado do curso, cuxas prácticas externas son de carácter estritamente académico. En ningún caso se entenderá que entre as partes se establecen relacións contractuais de clase mercantil, civil ou laboral, nin o seu contido poderá dar lugar á substitución da prestación laboral propia de postos de traballo de xeito tal que se cubran necesidades ordinarias da Administración de xustiza en detrimento de persoal público ao que lle correspondería ocupar as prazas que teñan atribuído o desempeño desas funcións, en lugar de recibir unha adecuada formación práctica, ao non concorreren os requisitos que esixen as leis. Como consecuencia disto, o Consello Xeral do Poder Xudicial, o Ministerio da Presidencia, Xustiza e Relacións coas Cortes e a Comunidade Autónoma de Galicia non están obrigados a realizar contraprestación económica ningunha.

A realización das prácticas non se considerará mérito ningún para o acceso á función pública, nin se poderá computar para os efectos de antigüidade ou de recoñecemento de servizos previos no conxunto das administracións públicas.

### **Terceira. Cobertura de riscos.**

A continxencia de accidentes sufridos ou que ocasione o alumnado durante a realización das prácticas externas a que se refire o presente convenio será asumida, exclusivamente, pola Universidade de Vigo, naqueles casos non cubertos pola Seguridade Social.

A Universidade estará obrigada a subscribir unha póliza de seguros para cubrir os danos de calquera tipo que poida ocasionar o alumnado participante nas prácticas externas, así como aqueles que poida padecer o dito alumnado en caso de accidente, nos supostos en que non os asuma a Seguridade Social e durante todo o período de duración das prácticas.

#### **Cuarta. *Condicións específicas das prácticas externas.***

1. O alumnado estará obrigado a:

- a) Cumprir os horarios e seguir as normas fixadas polo xulgado ou tribunal onde se realicen as prácticas externas.
- b) Adoptar unha actitude activa nas tarefas que se lle encomenden, inherentes ás liñas de formación para as que foi seleccionado.
- c) Manter contacto coa persoa ou persoas que exerce/n a tutoría e coa persoa que exerce a dirección das prácticas externas, se é que se designan, na forma en que se estableza.
- d) Cumprir as normas de prevención de riscos laborais.
- e) Manter o deber de segredo e confidencialidade en materia de medios, de procesos ou daquelas actuacións xudiciais ou administrativas das que poida ter coñecemento por razón das prácticas externas realizadas durante a súa estancia no xulgado ou tribunal onde se leven a cabo, incluso unha vez finalizadas estas, para o cal deberá subscribir o anexo do presente convenio.
- f) En caso de que estea establecido, entregarlle a memoria final no prazo previsto á persoa que desempeñe a tutoría da Universidade, a fin de poder superar as prácticas externas curriculares e de obter a correspondente mención favorable nas prácticas externas extracurriculares.

2. Os/As estudantes que realicen as prácticas non levarán a cabo ningunha das funcións atribuídas nos artigos 476, 477 e 478 da Lei orgánica do poder xudicial aos corpos xerais ao servizo da Administración de xustiza.

3. O alumnado ten dereito a:



- a) Desenvolver a actividade en que consistan as prácticas e no horario estipulado.
- b) Obter unha certificación final do desenvolvemento da súa actividade e do nivel de aproveitamento alcanzado.
- c) Obter permiso para acudir ás convocatorias de avaliación que lle afecten.

4. O xulgado ou tribunal onde se realicen as prácticas externas nomeará a persoa ou persoas que exercerá/n a tutoría das mesmas, que poderá recaer en maxistrado/a, xuíz/a ou letrado/a da Administración de xustiza. A persoa designada para realizar a tutoría debe obter a declaración de compatibilidade con carácter previo ao exercicio da actividade. A misión destas persoas será:

- a) Fixar o plan de traballo do alumnado.
- b) Orientar a este nas súas dúbidas e dificultades.
- c) Avaliar a actividade do alumno ou alumna mediante un informe.

Poderase establecer unha tutoría mixta desempeñada por xuíz/a ou maxistrado/a e mais letrado/a da Administración de xustiza.

5. O alumnado que finalice o período establecido de prácticas externas recibirá un certificado expedido polo xulgado ou tribunal no que consten as horas realizadas, a natureza das actividades levadas a cabo e o nivel alcanzado segundo a persoa ou persoas que exerza/n a tutoría das mesmas.

A Universidade de Vigo emitirá un documento acreditativo á persoa ou persoas que exerza/n a tutoría, e que así o soliciten, pola colaboración prestada no programa de prácticas externas.

#### **Quinta. *Protección de datos.***

Todos os afectados polo presente convenio quedarán obrigados polas disposicións e esixencias establecidas polo Regulamento (UE) 2016/679 do Parlamento Europeo e do Consello, do 27 de abril de 2016, relativo á protección das persoas físicas no que respecta ao tratamento de datos persoais e á libre circulación destes datos e polo que se derroga a Directiva 95/46/CE (Regulamento xeral de protección de datos), pola Lei orgánica 3/2018, do 5 de decembro, de protección de datos persoais e garantía dos dereitos dixitais, e polas demais disposicións vixentes sobre a materia.

### **Sexta. *Financiamento.***

O presente convenio non implica obrigas financeiras ou contraprestación económica entre as partes.

O cumprimento das obrigas en materia de seguridade social, de acordo coa disposición adicional quincuaxésimo segunda, apartado 4, letra b, do texto refundido da Lei xeral da Seguridade Social, aprobado polo Real decreto legislativo 8/2015, do 30 de outubro, corresponderá á Universidade de Vigo, na que os alumnos cursan estudos.

### **Sétima. *Difusión.***

Sen prexuízo do cumprimento das disposicións de aplicación en materia de publicidade e transparencia en relación coa subscrición do presente convenio, a Universidade de Vigo comprométese a destacar na súa memoria anual, e en cantas accións realice para a difusión das actividades obxecto deste convenio, a colaboración prestada polo Consello Xeral do Poder Xudicial, o Ministerio da Presidencia, Xustiza e Relacións coas Cortes, a Comunidade Autónoma de Galicia e os tribunais e xulgados afectados.

Este convenio será obxecto de publicación, de acordo co previsto na Lei 1/2016, do 18 de xaneiro, de transparencia e bo goberno da Administración pública galega. Así mesmo, incluírase no Rexistro Público de Axudas, Subvencións e Convenios, de conformidade co Decreto 132/2006, do 27 de xullo, polo que se regulan os rexistros públicos creados nos artigos 44 e 45 da Lei 7/2005, do 29 de decembro, de orzamentos xerais da Comunidade Autónoma de Galicia para o ano 2006.

### **Oitava. *Comisión de seguimento e control.***

1. Para o axeitado seguimento, coordinación, control e interpretación do establecido no presente convenio créase unha comisión de seguimento paritaria integrada por dous membros designados por cada unha das institucións asinantes e un/unha representante da Delegación do Goberno na Comunidade Autónoma de Galicia, que forma parte da representación do Ministerio da Presidencia, Xustiza e Relacións coas Cortes na citada comisión. A comisión reunirase polo menos unha vez ao ano e cando o determinen as partes.

No seo da comisión de seguimento poderanse pactar acordos respecto á execución e contido da formación en desenvolvemento do Plan Boloña, sempre que non afecte ao contido mínimo e esencial do convenio, sen necesidade de que posteriormente se inclúan como anexos do convenio.

2. A comisión rexerese, en canto ao seu funcionamento, periodicidade das reunións e vinculación dos seus acordos, polo disposto na sección 3ª do capítulo II do título preliminar da Lei 40/2015, do 1 de outubro, de réxime xurídico do sector público, que regula o funcionamento dos órganos colexiados.

#### **Novena. *Efectos e modificación do convenio.***

1. O presente convenio terá unha duración de catro anos naturais e producirá efectos unha vez inscrito no Rexistro Electrónico Estatal de Órganos e Instrumentos de Cooperación do sector público estatal, nos termos do artigo 48.8 da Lei 40/2015, do 1 de outubro, de réxime xurídico do sector público; e así mesmo será obxecto de publicación no *Boletín Oficial del Estado*.

Será prorrogable ao seu termo mediante acordo expreso por igual período, que se deberá formalizar con antelación á expiración do convenio.

Así mesmo, calquera das partes asinantes poderá proceder á súa denuncia expresa cun prazo mínimo de tres meses á data en que se pretenda a súa expiración.

2. As partes asinantes poderán modificar os termos do presente convenio en calquera momento, de mutuo acordo, mediante a sinatura dunha addenda.

#### **Décima. *Resolución do convenio anterior.***

Acórdase resolver o convenio suscrito entre o Consello Xeral do Poder Xudicial, o Ministerio de Xustiza, a Comunidade Autónoma de Galicia e mais a Universidade de Vigo, de data do 7/10/2021 (BOE do 22/10/2021), dando lugar á súa extinción desde a inscrición do presente convenio no Rexistro Electrónico Estatal de Órganos e Instrumentos de Cooperación.

Desde a data en que o presente convenio adquira eficacia xurídica substituirá na súa totalidade o convenio suscrito polo Consello Xeral do Poder Xudicial, o

Ministerio de Xustiza, a Comunidade Autónoma de Galicia e mais a Universidade de Vigo de data do 7/10/2021 (BOE do 22/10/2021), convenio que, por conseguinte, se declara extinto.

#### **Undécima. Causas de extinción.**

1. Os convenios extínguense polo cumprimento das actuacións que constitúen o seu obxecto ou por incorreren en causa de resolución.

2. O presente convenio entenderase resolto por algunha das seguintes causas:

- a) O transcurso do prazo de vixencia do convenio sen que se acordara a súa prórroga.
- b) O acordo unánime de todos os asinantes.
- c) O incumprimento, por parte dalgún dos asinantes, das obrigas e compromisos asumidos.

Neste caso, calquera das partes poderalle notificar á parte incumpridora un requirimento para que cumpra nun determinado prazo coas obrigas ou compromisos que se consideran incumplidos. Este requirimento seralle comunicado á comisión de seguimento e control da execución do convenio e ás demais partes asinantes.

Se transcorrido o prazo indicado no requirimento persiste o incumprimento, a parte que o dirixiu notificaralles ás partes asinantes a concorrencia da causa de resolución e entenderase resolto o convenio. A resolución do convenio por esta causa poderá implicar a indemnización dos prexuízos causados, se así se previu.

- d) Por decisión xudicial declaratoria da nulidade do convenio.
- e) Por calquera outra causa distinta das anteriores prevista no convenio ou noutras leis.

3. Desde a data do acordo de resolución do convenio ou da notificación da vontade de extinción, nos termos da presente cláusula, a colaboración manterase, en todo caso, e continuarán ata a súa finalización as actividades de prácticas iniciadas con anterioridade á data de referencia, sempre condicionado ao establecido no cuarto parágrafo da cláusula primeira do presente convenio.

#### **Duodécima. Natureza do convenio e resolución de controversias.**

O presente convenio, de natureza xurídico-administrativa, subscríbese ao abeiro da Lei 40/2015, do 1 de outubro, de réxime xurídico do sector público.

As controversias que poidan xurdir sobre a interpretación, modificación, execución, resolución e efectos que poidan derivar do presente convenio resolveranse entre as partes de maneira amigable no seo da comisión prevista na cláusula oitava.

Ao ter natureza administrativa, a orde xurisdiccional contencioso-administrativa será a competente para resolver as cuestións litixiosas que se poidan suscitar entre as partes, de conformidade co disposto nos artigos 1 e 2 da Lei 29/1998, do 13 de xullo, reguladora da dita xurisdición.

E de conformidade con canto antecede, os asinantes, no exercicio das facultades que legalmente lles corresponden e mediante as cales obrigan as institucións que representan, subscriben electronicamente o presente convenio.

**O PRESIDENTE DO CONSELLO XERAL  
DO PODER XUDICIAL  
P.S., O VOGAL**

**O SECRETARIO DE ESTADO DE  
XUSTIZA**

**Manuel Luna Carbonell**

**Manuel Olmedo Palacios**

**O VICEPRESIDENTE PRIMEIRO E  
CONSELLEIRO DE PRESIDENCIA,  
XUSTIZA E DEPORTES**

**O REITOR DA UNIVERSIDADE**

**Diego Calvo Pouso**

**Manuel Joaquín Reigosa Roger**

## ANEXO

\_\_\_\_\_, \_\_\_\_ de \_\_\_\_\_ de \_\_\_\_\_

| DATOS DO/A ESTUDANTE SELECCIONADO/A                                                                                                                                                                                                                                                                                                                                                                                                                                                                                                                      |  |                          |                 |                           |
|----------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------|--|--------------------------|-----------------|---------------------------|
| Nome e apelidos:                                                                                                                                                                                                                                                                                                                                                                                                                                                                                                                                         |  |                          | DNI:            |                           |
| Titulación que cursa:                                                                                                                                                                                                                                                                                                                                                                                                                                                                                                                                    |  |                          | Centro:         |                           |
| Domicilio:                                                                                                                                                                                                                                                                                                                                                                                                                                                                                                                                               |  | Concello:                |                 | Provincia:                |
| Cód. postal:                                                                                                                                                                                                                                                                                                                                                                                                                                                                                                                                             |  |                          |                 |                           |
| Teléfono móbil:                                                                                                                                                                                                                                                                                                                                                                                                                                                                                                                                          |  | Teléfono fixo:           |                 | Correo e.:                |
| DATOS DO XULGADO OU TRIBUNAL ONDE SE REALIZARÁ A PRÁCTICA                                                                                                                                                                                                                                                                                                                                                                                                                                                                                                |  |                          |                 |                           |
| Denominación:                                                                                                                                                                                                                                                                                                                                                                                                                                                                                                                                            |  |                          |                 |                           |
| Domicilio do xulgado ou tribunal onde se realizará a práctica:                                                                                                                                                                                                                                                                                                                                                                                                                                                                                           |  |                          |                 |                           |
| Concello:                                                                                                                                                                                                                                                                                                                                                                                                                                                                                                                                                |  |                          | Provincia:      |                           |
| DESCRIPCIÓN DA PRÁCTICA                                                                                                                                                                                                                                                                                                                                                                                                                                                                                                                                  |  |                          |                 |                           |
| Ref. convocatoria:                                                                                                                                                                                                                                                                                                                                                                                                                                                                                                                                       |  | Modalidade da práctica:  |                 | Centro xestor:            |
| Data de inicio:                                                                                                                                                                                                                                                                                                                                                                                                                                                                                                                                          |  | Data final:              | Total de horas: | Total de meses:           |
| Horario:<br>(Os horarios serán en todo caso compatibles coa actividade académica, formativa e de representación e participación desenvolvida polo/a estudante na Universidade.)                                                                                                                                                                                                                                                                                                                                                                          |  |                          |                 |                           |
| Titor/a do xulgado ou tribunal:                                                                                                                                                                                                                                                                                                                                                                                                                                                                                                                          |  | Correo e.:               |                 | Teléfono:                 |
| Titor/a da Universidade:                                                                                                                                                                                                                                                                                                                                                                                                                                                                                                                                 |  | Correo e.:               |                 | Teléfono:                 |
| Proxecto formativo (tarefas a desenvolver):                                                                                                                                                                                                                                                                                                                                                                                                                                                                                                              |  |                          |                 |                           |
|                                                                                                                                                                                                                                                                                                                                                                                                                                                                                                                                                          |  |                          |                 |                           |
| DECLARA:                                                                                                                                                                                                                                                                                                                                                                                                                                                                                                                                                 |  |                          |                 |                           |
| O/A alumno/a manifesta coñecer e aceptar as condicións e compromisos establecidos no convenio e dá a súa conformidade para realizar as citadas prácticas externas, ao tempo que asume o compromiso do deber de segredo e confidencialidade en materia de datos das persoas, procesos e actuacións xudiciais de que poida ter coñecemento, asegurando que manterá o segredo durante e unha vez finalizado o período de prácticas externas. Así mesmo, manifesta coñecer que en caso de incumprimento incorrería nas responsabilidades a que houber lugar. |  |                          |                 |                           |
| Por parte do xulgado ou tribunal onde se realiza a práctica                                                                                                                                                                                                                                                                                                                                                                                                                                                                                              |  | Por parte do/a estudante |                 | Por parte da Universidade |
|                                                                                                                                                                                                                                                                                                                                                                                                                                                                                                                                                          |  |                          |                 |                           |
| Asdo.:                                                                                                                                                                                                                                                                                                                                                                                                                                                                                                                                                   |  | Asdo.:                   |                 | Asdo.:                    |